

繡刻四賢

記定本

目錄

第一齣 開演

第二齣 義勸

第三齣 燈宴

第四齣 孝養

第五齣 寓奸

第六齣 遷擢

第七齣 囑託

第八齣 分岐

第九齣 構釁

第十齣 媒議

第十一齣 解綬

第十二齣 允娶

第十三齣 入宅

第十四齣 致歸

第十五齣 招納

第十六齣 祈熊

第十七齣 挑鬪

第十八齣 賜胤

第十九齣 弄璋

第二十齣 報命

第二十一齣 訓讀

第二十二齣 社會

第二十三齣 出家

第二十四齣 夢警

第二十五齣 送炭

第二十六齣 遭難

第二十七齣 路贈

第二十八齣 投栖

第二十九齣 詰問

第三十齣 奏凱

第三十一齣 告貸

第三十二齣 赴選

第三十三齣 泣夜

第三十四齣 請假

第三十五齣 邂逅

四賢記 目錄

四

第三十六齣 尋親

第三十七齣 會母

第三十八齣 具慶

四賢記

明 無名氏 著

第一齣 開演

〔意難忘詞〕〔末上〕烏古孫公。享榮華富貴。乏嗣傳宗。堅心辭納寵。甘作白頭翁。妻杜氏。娶姘容。眞德量寬洪。更可欽王家孝女。禮義雍雍。天王特賜罷熊。當侍姬入道。妖寇興戎。許君能濟困。楊姬亦多功。賢公子早登庸。喜慶相情隆。泰山追尋庶母。骨肉重逢。

第二齣 義勸

〔滿江紅〕〔生上〕簡命南臺。司憲紀霜清秋肅。熙盛世功名昭著。受天申祿。一點丹衷期補袞。半生孝道成虛局。是何年白壁育藍田。我心方足。〔鷓鴣天〕豪氣千尋貫碧空。彩毫捷徑已先通。身歸版冊輿圖裏。心寓詩書禮樂中。膺寵命。顯英雄。金章紫綬五花驄。朝廷有道青春好。沛雨和風處處同。自家烏古孫澤。表字潤甫。裔本完顏。言從華譚。編插淮寧。百

有餘載。荷蒙大元皇帝詔賜右榜進士。累陞建康肅政廉訪使之職。褰帷觀察。攬轡澄清。公廉寡欲。娟娟明月照鸚冠。直節端方。凜凜清霜飛象簡。室人杜氏。真擬孟光之賢。侍婢丁香。頗習小蠻之技。但我年將不惑。身後無人。旣獲譴於聖經。又遺慚於宗祀。咳。休提身外無窮事。且盡生前有限杯。院子何在。(小生上)自古迎春喜建寅。今年寅日正逢春。千門萬戶曠曠日。盡道天家雨露新。覆老爺有何台旨。(生)夜來着你治酒。可曾完否。(小生)完備多時了。(生)傳話後堂。着丁香伏侍夫人出來。(小生)領鈞旨。(旦上)

〔念奴嬌〕香雲靄靄。倚鏡臺整理寶髻鸞釵。(丑上)芳草初芽。幽禽試舌。春色來何快。(合)唱隨繾綣。人在蓬壺瀛海。(相見介)(木蘭花)(生)小園半夜東風轉。吹皺冰池雲母面。(旦)曉披閨闥見朝陽。知向碧階添幾線。(丑)小烟弄柳晴方煖。殘雪禁梅香尙淺。(小生)殷勤洗拂舊東君。多少韶華都借看。(生)夫人。茲當人日。會遇新春。潔整辛盤。少充家慶。(旦)妾方舉念。君亦同心。敬從尊命。看酒過來。

〔六犯宮詞〕紅椒新醞。青絲生菜。燕喜時逢清泰。春還人日。壺中甲子天開。

〔旦〕綵勝隨宜翦。花枝別樣裁。三星照。百歲諧。蟠桃會裏共君來。〔丑〕華堂燭影搖金帶。翠幄蓮香擁繡鞋。〔小生〕願老爺奶奶呵。振振麟趾。嚶嚶鳳喈。綸音不斷恩光大。〔合〕永和諧。夫榮妻貴都是命安排。〔生〕院子。把酒席收過了。〔小生應下〕夫人。你看時光易過。齒髮無情。細思兩字功名。總是一場虛幻。〔旦〕此相公知止之言。高尚其志。只一件。你雖然宜室宜家。尙未弄璋弄瓦。妾將邁矣。君可惕然。〔生〕夫人貌比桃花。性同玉潤。正在孕珠之際。胡出分枕之談。〔旦〕賤軀多恙。生意爲艱。莫若寵娶新房。庶可嗣全後胤。〔生〕說那裏話來。

〔桂枝香〕年華非邁。充閭有待。追尋比翼同心。忍使割恩分愛。〔旦〕相公。不孝有三。無後爲大。〔生〕謝娘行介懷。謝娘行介懷。你的德齊嵩岱。量弘滄海。我淚盈腮。枉慕燕山桂。空臨玉鏡臺。

〔前腔〕〔旦〕宗祧何賴。弓裘誰代。從來無子重婚。莫爲有妻妨礙。〔生〕夫人。我想商瞿四十而生五子。今卑人與你年亦如是。何患無兒。〔旦〕望君家記懷。望君家記懷。你的盛年難再。韶顏易改。我自疑猜。伯道天亡後。淳于世所哀。〔丑〕婢子當時在家。曾與

老爺算過命來。〔生〕算我如何。

〔前腔〕〔丑〕算老爺呵。命膺冠蓋。身居鼎鼐。並不犯寡宿孤辰。也不犯三刑六害。算奶奶呵。在明年誕懷。在明年誕懷。鸞星交泰。蚌珠生彩。我笑咳咳。百子紅樓近。三天赤腳來。

〔生〕富貴榮華似夢中。

〔旦〕相看又做白頭翁。

〔丑〕冥冥樹德無人見。

〔合〕天上麒麟信必通。

第三齣 燈宴

〔小生上〕薄雪初消野未耕。賣薪買酒看昇平。吾王勤儉娼優拙。自是豐年有笑聲。自家乃是戶部分司一員供應官。今乃上元佳節。華國燈宵。蒙本司許爺着我備酒。延請烏古孫爺慶爺二位觀燈。果然好景也。但見處處烟花。家家燈火。綺羅春富貴。簫管夜紛紜。散開一種芙蓉。化作滿城菡萏。三星在戶珠簾捲。萬燭當樓寶扇開。輝光燦爛。分明是一座鰲山。形勢嵯峨。想像那九重鳳闕。緊步的不覺暗塵隨馬去。緩步的堪憎明月逐人來。霓裳子弟。踏歌可遏行雲。竹馬兒童。賽鼓不分清漏。碎

紛紛蛾蝶高飛。既來不返。活潑潑魚龍戲影。似假疑真。教坊司差幾個舞盤的妓者。他能弄百尺高竿。勾欄院送兩班跳鬼的廝兒。自做出諸般雜劇。那壁廂巧笑倩兮。見佳人遺鈿墮翠。這壁廂美目盼兮。喜公卿佩紫拖朱。玳瑁筵。珍饈味。夜夜元宵。琉璃鍾。琥珀濃。朝朝寒食。正是春回。璧月華燈裏。人在蓬壺閬苑中。道猶未了。許爺早到。(外上)

〔卜算子〕粉署喜清閒。綺席延時彥。連宵燈火吐祥烟。萬井氤氳滿。自家許益。字友文。山東淄水人也。官拜戶部員外郎。駐劄江南。董督漕課。尊賢禮士。寧辭三握之勞。節用愛民。亦竊五袴之頌。所喜烏古孫潤甫。與我十分契厚。情若同胞。茲值燈宵。豈宜虛度。適已差官去請。并邀建康路總管慶稚卿同赴良筵。少據官況。供應官筵席完了麼。(小生)完了。(外)孫慶二爺到來。疾忙通報。(小生)領鈞旨。

〔前腔〕(生上)紫陌畫橋邊。(末上)翠館紅樓畔。(合唱)燈光月影共嬋娟。此景佳無限。(相見介外)我有嘉賓。鼓瑟吹笙。(生末)雖有兄弟。不如友生。(生)小弟方將偃屈。反辱先施。(末)慶童分居屬吏。豈堪共席。(外)下官與潤甫賢弟。均承簡命。各守地方。且與慶先生休戚相關。

何乃過讓。供應官將酒過來。

〔梁州序〕天街雪霽。帝城春暖。拂拂條風初遍。人逢佳節。何妨取樂追歡。畢竟乘鸞緱嶺。跨鶴揚州。遂卻生平願。黎民齊擊壤。慶豐年。振動東南半壁天。〔合〕斟綠醕。開華宴。拚夜深沈醉蓬萊院。歌麗曲。撒金錢。

〔前腔〕〔生末〕元宵三五。新正當半。早有梅開一點。仙臺光滿。應憐皓月娟娟。試看星橋合鎖。火樹攢花。燦爛驚人眼。攔街喧笑也。縱奇觀。百道金蛇上碧天。

〔合前二旦扮官妓衆扮伶人上〕鮑袖舞郎當。秦喉歌遶梁。新正三五夜。何處不風光。伶人官妓叩頭。〔小生〕起來。大吹大擂。送各位爺觀望鰲山。

〔前腔〕〔衆唱〕九華燈銀燭高燃。八寶燈紅光飛豔。怪無知老子長揖燈前。只見牛郎燈影。織女燈輝。在烏鵲燈兒畔。鴛鴦燈作侶。錦燈懸。十二朱樓別有天。

〔合前〕

〔前腔〕鳳凰燈瑞現岐山。孔雀燈春生屏幔。掛麟獅虎豹獬豸燈連。又見鬬雞

燈巧。舞鶴燈奇。走馬燈兒戰。魚龍燈戲水。鼓燈圓。忽訝銀河落九天。〔合前〕

〔節節高〕蝦燈鬚兩鬢。蟹燈鮮。螳螂燈怒臂。休相援。紗燈炷。纓絡妍。油花燭。鮫綃燈片片。腥紅茜。繡毬燈滾滾。珍珠串。〔合〕紫禁烟花十萬重。鰲山景物尤堪羨。

〔前腔〕香爐燈裊烟。橘燈旋。榮燈雅淡青不變。蓮燈淺。藕似船。荷檠捲。芙蓉燈照映。嬌娥面。牡丹燈巧出佳人翦。〔合前外〕供應官。吩咐他去罷。明日領賞。〔衆應下〕

〔尾聲〕金吾不禁遲銀箭。一任驂遊步衍。此夜歡呼興獨偏。〔生末〕夜深告辭了。

〔生〕客漏迢迢興已闌。

〔末〕燈前月下酒杯寬。

〔外〕不知天上今宵樂。

〔小生〕應似人間一樣歡。

第四齣 孝養

〔霜天海角〕〔小旦上〕桑樞蓬戶。居處甘淒楚。愁擬傷心杜宇。情同反哺慈鳥。

脈脈暗傷情。鶯鶯志愈貞。蛾眉攢損黛。鴉髻彈銷青。明月隨孤影。纓華負此生。報劉嗟日短。哽咽淚

交傾。奴家王氏。陳州人也。幼長良門。未歸靖室。不幸爹娘棄世。獨存祖母在堂。爭奈家業凋零。全賴女紅資給。衣襟寒砧。錯認村春。雨外急。席遮破壁。翻嫌鄰火夜深明。穿花作鈿。臨妝兀自羞慚。削竹爲簪。結束有誰嘲笑。爲愛清香焚柏子。欲親寒素伴梅花。

〔四朝元〕梅花寒素。清芬想像奴。是羅浮仙種。不染塵土。偏與那松竹伍。痛雙親早暮。痛雙親早暮。爲甚厭棄人寰。超馭仙都。寧撇孩兒。怎拋慈母。生死同岐路。論我這般樣窮命。不如死休。只是撇婆婆不下。好苦呀。疾首自心孤。白髮紅顏。命薄如朝露。高堂年紀多。耳聾目將瞽。萬千愁緒。啾啾唧唧。向誰哀訴。向誰哀訴。自從雙親早喪。幸虧姨母相周。只是他是個寡婦。全賴收生糊口。教我也難饕餮。今早缺欠供膳。不免磨麥充飢則個。

〔前腔〕含啼捱磨。行行力氣無。奈敝家纖手。蹙趑嬌步。也知是沒奈何。怕婆婆發怒。怕婆婆發怒。道我定省空勞。甘旨全疎。潔爾晨餐。貧而無措。忍見塵生釜。古人有言。蠶鹽樂道。菽水承歡。只是我祖母年近七旬。風燭不定。分當衣之以帛。食之以肉。纔是爲

孫女的孝順。今日一貧如洗。將菽水奉養他。好惶恐人也。嗟。每日裏強支吾。菽水承歡。他慈愛還如故。我殷勤磨此麤。暫時濟飢餓。釵荆裙布。孤孤影影。兩相回護。兩相回護。〔丑上〕老病如枯鶴。相將鬼作鄰。堂前無孝子。膝下有賢孫。〔小旦〕孩兒磨麵太急。得無驚寢高堂。〔丑〕非也。我看你年時二紀。工貌雙妍。孝過崔姬。賢同德曜。欲尋佳配。未得其人。夜來輿思及此。焉能高枕忘憂。你聽我道。

〔孝順歌〕你溫柔性。窈窕軀。青春正當二十餘。偃蹇未于歸。哀哀泣霜杵。棲遲破廬。〔小旦〕孩兒奉侍有日。適人之事。說他則甚。〔丑唱〕奈我景入桑榆。又無家計。你只管顧戀區區。畢章相擔誤。〔小旦〕婆婆得一日活。孩兒盡一日孝。不必掛懷。〔丑唱〕貞與孝載史書。待來生我報汝。

〔前腔〕〔小旦〕聽說罷。淚似珠。飄飄此身水上鳧。痛殺我先人。孤魂在何所。幽明異途。〔丑〕我饑寒不免。歸路有期。獨可惜你去後如何結果。〔小旦〕衰老親婆。少年孫女。兩口相依。甘受饑寒苦。我那婆婆呀。奴豈做薄倖徒。若嫁人未必好結果。

〔前腔〕〔貼旦上〕羅敷節能自如。朝來見憐止屋烏。呀。爲甚的眼模糊。其中有緣故。〔小旦〕實不相瞞。娥娘說。方纔祖母言及眼前諸務。不覺痛傷如此。〔貼旦〕我曉得了。敢爲饗殮已無。〔丑〕楊姨母請坐。〔貼旦〕親家母。你人逐仙遊。家居荒土。且莫悲傷。苦樂皆天數。老身帶有百貫錢在此。我兒你收去。錢百貫供菜蔬。倘空虛再相助。〔丑〕需索多遭。犬馬難報。〔貼旦〕至親之間。何報之有。

〔丑〕蕭蕭風色擁柴門。

〔貼〕隔嶺猿啼欲斷魂。

〔小旦〕孤寡不堪貧徹骨。

〔合〕方捱白晝又黃昏。

第五齣 寓奸

〔出隊子〕〔淨上〕不衫不履。戀酒迷花學做癡。端公左道頗蹺蹊。牛馬襟裾好滑稽。就裏機關。許誰得知。自家叫做棒胡。陳州元是故都。年紀方登弱冠。爲人一味糊塗。心似鉤灣又曲。膽如天大猶粗。酷愛使鎗弄棍。偷忙逐犬熏狐。崇事虛無之教。能燒鉛汞之爐。慣誘風流童叟。曾拐標致尼姑。此中素有大志。權爲市井狂徒。夜來只少一件。〔內云〕少那件。〔淨笑介〕只少

箇護腳的家婆。迤邐行來。此間已是集福道院。有箇道士張霞杯。頗有仙風。深諳世故。不免進去。與他閒話一回。有何不可。有人麼。〔小生〕

〔前腔〕桃源洞裏。白鹿青牛去復歸。眠雲枕石樂天機。回首興亡一局棋。未審何人。前來問奇。棒相公稽首。〔淨〕張丫胚拜揖。〔小生〕霞杯乃貧道賤號。何以戲爲。〔淨笑介〕莫怪莫怪。兩日不到仙莊。開口便覺粗俗了。張先生。我小子不蠶而衣。不田而食。請問如何可以治生。〔小生〕何不商賈爲業。〔淨〕什麼叫做商賈。〔小生〕行貨曰商。居貨曰賈。〔淨〕不將辛苦意。難趁世間財。不去做他。〔小生〕援例求一文武官職何如。〔淨〕朝臣待漏五更寒。鐵甲將軍夜渡關。勞碌大一發不去做他。論嗜家的主意。只今朝廷無道。僭御中華。不若先收河洛。打破燕京。尋一頂白帽兒戴戴。卻不是好。〔小生〕

〔好姐姐〕呀。少年落魄不羈。白帽兒非通容易。大言不慚。豈是人所爲。眞狂悖。隔牆有耳。君須記。棒相公。你方纔幸爾對我說。萬一對他人說呵。泄漏風聲。受族誅。

〔前腔〕〔淨〕道人你又來見鬼。笑談中原非眞意。想潛龍在淵。直須會雷雨。忘

年契感蒙金玉諄諄諭。從此吞聲不再提。

〔淨〕閒來松院訪仙翁。

風裊茶烟九曲通。

〔小生〕窗上日光彈指過。

一番清話又成空。

第六齣 遷擢

〔鵲橋仙〕〔生〕廉持霜斧。明懸冰鑑。浪有聲名播遠。當今聖主惠黎元。四顧河清海晏。自家蒞任以來。歷俸計踰三載。廉訪各屬賢能。漢人大居其半。然而治蹟異常。考得慶童爲最。前特具疏保薦。陞授廣東廉副。間有一二不臧者。已經明斥其非。使令改過遷善。大都君子成人之美。豈忍計之下者。正是但存方寸地。留與子孫耕。〔外上〕稟爺慶總管到門稟見。〔生〕道有請。

〔粉蝶兒〕〔末〕視篆三年。喜備門庭良選。老大人請上。卑職慶童有一拜。仰荷吹揚。謬膺新命。未遑報本。先布謝言。〔生〕稚卿恂恂雅度。燁燁清才。久已立名。允宜高擢。今下官呵。

〔畫眉序〕爲國薦高賢。冰鏡無私照清淺。羨君家卓異。拔萃居先。念斯須借寇攀轅。料早晚徵黃歸院。〔合〕此行雖隔三千里。同瞻舜日堯天。